

STJÓRNARTÍÐINDI B 72 – 1990

19. nóvember 1990

1249

Nr. 467

REGLUGERÐ

um rekstrarkostnað stofnana fatlaðra.

I. KAFLI

Gildissvið.

1. gr.

Reglugerð þessi tekur til stofnana fatlaðra skv. 2.–13. tölul. 7. gr. laga um málefni fatlaðra nr. 41/1983 svo og þjónustu og starfsemi í samræmi við 7. gr.

II. KAFLI.

Almenn atriði.

2. gr.

Rekstrarkostnaður stofnana skv. 2.–13. tölul. 7. gr. laga um málefni fatlaðra, sem ekki er greiddur af sértekjum eða eigin fé, greiðist úr ríkissjóði.

Um rekstur stofnana skv. 1. og 14. tölul. 7. gr. fer samkvæmt lögum nr. 112/1976 og 2. gr. laga nr. 87/1989.

Umsjón svæðisstjórna með rekstri stofnana (á svæðinu).

3. gr.

Svæðisstjórnir og framkvæmdastjórar þeirra skulu árlega gera fjárlagatillögur og senda þær félagsmálaráðuneyti.

Áætlanir þessar skulu gerðar í samvinnu við forstöðumenn þeirra stofnana sem undir svæðisstjórnir heyrja.

Ákvæði þessarar greinar taka til stofnana sem reknar eru af svæðisstjórn svo og sjálfseignarstofnana og stofnana á vegum félagasamtaka.

4. gr.

Svæðisstjórn hefur umsjón með eignum og rekstri stofnana á sínu svæði í samræmi við 11. gr. laga um málefni fatlaðra. Framkvæmdastjóri svæðisstjórnar annast þetta verkefni í umboði svæðisstjórnar.

Framkvæmdastjóri svæðisstjórnar hefur í umboði félagsmálaráðuneytis eftirlit með rekstri þeirra stofnana á viðkomandi svæði sem svæðisstjórn annast sjálf, sbr. 3. mgr. 11. gr. laga um málefni fatlaðra.

5. gr.

Svæðisstjórn skal árlega í fjárlagatillögum sínum áætla kostnað vegna ýmiss konar þjónustu sem ekki fellur beint undir stofnanir á svæðinu. Kostnaður sá er hér um ræðir er m. a. námskeiðahald fyrir starfsmenn, ferðakostnaður starfsmanna, sértæk þjónusta við fatlað fólk í heimahúsum og félagsstarfsemi.

Bókhald og fjárgæsla.

6. gr.

Fjárgæsla stofnana sem undir svæðisstjórnir heyra skal vera hjá ríkisféhirði nema annað kunní að vera ákveðið.

Bókhald stofnana sem undir svæðisstjórnir heyra skal vera hjá Ríkisbókhaldi nema annað kunní að vera ákveðið.

Starfsmannahald.

7. gr.

Fjöldi starfsmanna á þjónustustofnunum samkvæmt lögum um málefni fatlaðra skal miðast við mat á þjónustuþörf á íbúa á viðkomandi stofnun. Slíkt mat skal fara fram þegar stofnun tekur til starfa og síðan árlega. Félagsmálaráðuneytið skal sjá um að hið árlega mat fari fram.

8. gr.

Heimilt er, að fengnu samþykki ráðuneytis, að flytja heimiluð stöðugildi á tiltekinni stofnun eða viðfangsefni á aðra stofnun eða viðfangsefni svæðisstjórnar innan fjárlagaársins, ef mat á þjónustuþörf beggja stofnana leiðir í ljós að það er félagslega og fjárhagslega hagkvæmt að flytja stöðuheimildir til með þeim hætti um tiltekið skeið.

Þetta gildir um þær stofnanir sem hafa hafið rekstur.

9. gr.

Á stofnunum þeim er undir reglugerð þessa falla skal að öðru jöfnu starfa fólk með menntun í meðferð og umönnun fatlaðra.

Sértekjur stofnana.

10. gr.

Tekjur sem til falla vegna starfsemi stofnana, þ.m.t. af atvinnurekstri, skulu koma til frádráttar útgjöldum þeirra.

Akstur og flutningskostnaður.

11. gr.

Akstur fatlaðra til og frá þjónustustofnunum, sem undir lög nr. 41/1983 falla, og vegna annarrar nauðsynlegrar sértækra þjónustu, sem veitt er fötluðum sérstaklega, greiðist úr ríkissjóði.

Um getur verið að ræða akstur með almenningsfarartækjum eða sérstaka flutningsþjónustu sem svæðisstjórn skipuleggur.

Kostnaður sá sem hér um ræðir skal færður til útgjalda hjá viðkomandi svæðisstjórn.

Ákvæði þessarar greinar eiga ekki við um akstur og ferðakostnað til og frá sumardvalarheimili og skammtímvistun.

12. gr.

Svæðisstjórn skipuleggur og annast akstur vegna þeirra einstaklinga sem dvelja utan stofnana en sækja þjónustu til viðurkenndra þjónustustofnana sem undir lög um málefni fatlaðra heyra, sbr. þó 4. mgr. 11. gr. reglugerðar þessarar, í samræmi við heimildir fjárlaga hverju sinni samkvæmt eftirfarandi meginreglum:

Ef um hópakstur er að ræða er heimilt að greiða samkvæmt sérstökum aksturssamningi allt að 80 km daglega.

Ef um einstaklingsakstur er að ræða er heimilt að greiða samkvæmt sérstökum aksturssamningi allt að 70 km daglega.

Kostnaður sá sem hér um ræðir skal færður til útgjalda hjá viðkomandi svæðisstjórn.

13. gr.

Rekstrarkostnaður bifreiða á stofnunum, sem notaðar kunna að vera til að flytja íbúa á aðra þjónustustofnun, færast til útgjalda á þá stofnun sem telst eiga viðkomandi bifreið.

Meðferð einkafjármuna.

14. gr.

Forstöðumenn stofnana, þar sem íbúar eru búsettir, eru ábyrgir gagnvart handhafa starfsleyfis, íbúum eða umboðsmönnum þeirra um vörslu einkafjármuna þeirra og sameiginlegra sjóða. Halda skal bókhald hér að lútandi samkvæmt nánari reglum er félagsmálaráðuneytið setur.

Viðhaldskostnaður.

15. gr.

Um viðhald annarra stofnana en sambýla fer samkvæmt ákvörðun fjárlaga hverju sinni.

II. KAFLI

Sérákvæði um einstakar stofnanir.*Sambýli.*

16. gr.

Eðlilegt (rekstrar-) viðhald sambýla greiðist í samræmi við ákvæði 11. gr. reglugerðar nr. 541/1988 fyrir sambýli.

Um fjárreiður og bókhald á sambýlum fer skv. 11. gr. reglugerðar um sambýli nr. 541/1988.

Halda skal bókhald hér að lútandi samkvæmt nánari reglum sem félagsmálaráðuneytið setur.

17. gr.

Ríkissjóður greiðir fæðiskostnað starfsmanna á sambýlum; fjárhæð sem samsvarar fæðisfé eins og það er skilgreint í kjarasamningi á hverjum tíma. Fæðiskostnaður þessi rennur í heimilissjóð í hverju sambýli.

Verndaðir vinnustaðir og hæfing til vinnu.

18. gr.

Tekjur verndaðs vinnustaðar skulu að jafnaði standa undir hráefniskaupum og almennum rekstrarútgjöldum. Laun til starfsmanna greiðist úr ríkissjóði, enda sé fjárveiting í fjárlögum.

19. gr.

Hráefniskaup og aðföng vegna vinnu á hæfingarstöðvum er hluti rekstrarkostnaðar.

Ríkissjóður greiðir laun leiðbeinenda á hæfingarstöðvum. Heimilt er að þóknun sem greidd er fötludum starfsmönnum sé greidd úr ríkissjóði.

Tilfallandi tekjur koma til frádráttar á rekstrargjöldum.

20. gr.

Sértekjur sem til falla af starfsemi og atvinnurekstri verndaðra vinnustaða og hæfingarstöðva skulu koma til frádráttar útgjöldum þeirra, sbr. 10. gr.

21. gr.

Félagsmálaráðuneytið, í samvinnu við fjármálaráðneyti, setur nánari reglur um meðferð fjármála og bókhald verndaðra vinnustaða, þ.á.m. varðandi bankaviðskipti þeirra og birgðahald.

22. gr.

Svæðisstjórn skal árlega áætla kostnað vegna leiðbeinenda fatlaðra á vinnumarkaði og sökum stuðnings, sem fötluðum er veitt í atvinnulífinu, utan stofnunar. Ennfremur skal svæðisstjórn gera áætlun um atvinnuleit fatlaðra.

III. KAFLI

Sérákvæði um stofnanir félagasamtaka og sjálfseignarstofnanir.

23. gr.

Sjálfseignarstofnanir og stofnanir á vegum félagasamtaka, sem reknar eru samkvæmt lögum um málefni fatlaðra og njóta framlaga úr ríkissjóði, skulu skila viðkomandi ráðuneyti, svæðisstjórn, Ríkisbókhaldi og Ríkisendurskoðun, ársreikningi undirrituðum af löggiltum endurskoðanda ásamt skýrslu um starfsemi liðins árs.

24. gr.

Ef misbrestur verður á bókhaldi og fjárreiðum, þ.á m. einstaklinga, í sjálfseignarstofnunum og stofnunum reknur af félagasamtökum skal félagsmálaráðuneytið, að fengnum tillögum svæðisstjórnar, vísa málinu þegar í stað til meðferðar hjá Ríkisendurskoðun skv. 7. gr. laga nr. 12/1986.

25. gr.

Fjármálaráðuneyti fer með samningsumboð sjálfseignarstofnana og stofnana félagasamtaka varðandi kaup og kjör starfsmanna á stofnunum þessum. Launaskrifstofa ríkisins annast launagreiðslur, nema annað sé ákveðið.

26. gr.

Afskriftir húsa og búnaðar sjálfseignarstofnana og stofnana félagasamtaka telst ekki til þess rekstrarkostnaðar sem ríkissjóði er skylt að greiða. Gera skal þó grein fyrir slíkum afskriftum í ársreikningi.

27. gr.

Vextir og fjármagnskostnaður vegna lána sem sjálfseignarstofnanir og stofnanir félagasamtaka kunna að taka vegna fjárfestinga og rekstrar telst ekki til þess rekstrarkostnaðar sem ríkissjóði er skylt að greiða.

28. gr.

Svæðisstjórnir annast rekstrareftirlit með sjálfseignarstofnunum og stofnunum félagasamtaka. Skylt er að veita fulltrúum þessara aðila aðgang að stofnunum til eftirlits og upplýsinga um allt er varðar starfsemi þeirra og afkomu, þ.m.t. bókhald þeirra og fjárreiður allar.

29. gr.

Reglugerð þessi, sem sett er samkvæmt lögum nr. 41/1983 um málefni fatlaðra, öðlast gildi þegar í stað.

Félagsmálaráðuneytið, 19. nóvember 1990.

Jóhanna Sigurðardóttir.

Þorgerður Benediktsdóttir.